



"Obrazovanje nije proizvod": Melisa Fejzić o zajednici i promjeni

Melisa Fejzić, budući psiholog i InŠkola influencerica, vjeruje da obrazovanje nije proizvod nego prostor za rast. Njena poruka nastavnicima i mladima: InŠkola je mjesto gdje promjena dobija adresu.

PEACEBUILDING FUND

UJEDINJENE NACIJE BOSNA I HERCEGOVINA

Dijalog za budućnost

INSKOLA.COM

"NASTAVNIK JE TU DA PROBUDI ZNATIŽELJU ZA OTKRIVANJEM"

-MELISA FEJZIĆ
STUDENTICA PSIHOLOGIJE

Melisa Fejzić bi sebe opisala jednom rečenicom: znatiželjna, ambiciozna i veoma, veoma uporna žena usmjerena na rad s mladima. Budući psiholog, istraživač, osoba koja u obrazovanju ne traži samo znanje nego i prostor za razgovor, podršku i

promjenu. I neko kome je InŠkola, na kraju krajeva, samo jedna riječ: zajednica.

Njeno iskustvo InŠkole počelo je spontano, kako sama kaže, bez jasnih očekivanja. Jedino što je znala je da se platforma bavi onim što joj je važno i sada, i u budućnosti: obrazovanjem.

Znanje koje otvara vrata

Melisa o obrazovanju ne govori kao o prenosu informacija. Govori o njemu kao o prostoru u kojem se otkrivaju vlastiti potencijali.

"Nastavnik nije osoba koja samo evaluira, koja je tu da nas nešto pouči, već da u nama probudi znatiželju za otkrivanjem ne samo novih perspektiva, već i vlastitih potencijala i mogućnosti."

Ova uvjerenost nije nastala slučajno. Kroz studiranje, Melisa je imala profesore koji su je prepoznali, pratili i ostavljali trag koji daleko premašuje gradivo. Jedan od njih bio je njen uzor u pravom smislu: "Ono što je od toga ostalo pored znanja, jesu životne lekcije i vrednote koje nam je, koristeći svaku priliku, prenosio."

Od njega nosi i jednu rečenicu: "Pohvala vrijedi kao i onaj koji je daje." I trudi se biti od onih od kojih pohvale imaju smisao.

Predstaviti ideju, ne prodati je

Kada je dobila zadatak da predstavlja InŠkolu studentima i kolegama, Melisa je od prvog dana znala da joj je najvažnije jedno: da niko ne osjeti da joj nešto prodaje.

"O tome da niko nema osjećaj da nešto, uvjetno rečeno, prodajem, vodila sam najviše računa. Utoliko je uloga bila i teža, jer u obrazovanju nema i ne treba biti kupoprodajnih ugovora."

Zato je u susretima sa studentima stvarala klimu u kojoj su pitanja bila dobrodošla, atmosfera nije bila monotona i svako je mogao da se obrati tokom izlaganja. Rezultat je bio jasan: "Na kraju je to potvrđeno i njihovom željom da pored participacije u aktivnostima, postanu dio InŠkole."

Biti influencerica koja promovira ideju, kaže, nije se previše razlikovalo od onoga što svakodnevno radi. "Samo je dobilo jedno novo ime."

Prostor za one koji žele promjenu

Jedno od zapažanja koje Melisa dijeli iz tih susreta posebno ostaje: volja za promjenom u obrazovanju postoji, ali joj često nedostaje prostor.

"Postoje mišljenja o tome šta jeste dobro, a šta treba promjenu i želja da se ona desi. Ono što nažalost nekada izostaje, pored volje koja je nadoknativa i varljiva, jeste i nemogućnost promjene usljed nepoznavanja procesa, ali i mjesta na koja mogu da se obrate."

InŠkola je, prema njenim riječima, upravo to: novo otkriveno mjesto za ljude koji znaju da žele promjenu, ali nisu znali gdje da krenu.

Poruka onima koji misle da nemaju dovoljno iskustva

Melisa ima jasnu poruku za mlade koji oklijevaju da se uključe u obrazovne inicijative jer misle da nisu dovoljnoiskusni.

"Uvijek kada su u pitanju prilike za bilo kakvo iskustvo, koje se ne tiče samo formalnog obrazovanja, podržavam ih i iskreno preporučujem. Svako je iskustvo vrijedno i ono na čemu zaista insistiram jeste da nema bespotrebnog utroška vremena, jer investiranje u iskustva nas bogati u svakom smislu."

A nastavnicima i nastavnicama koji još nisu dio InŠkole poručuje:

"Ukoliko je nekada postojao momenat u kojem su osjećali potrebu za mišljenjem, iskustvom, savjetom, bilo kojim resursom, postoji mjesto koje sučeljava sve to, a to je InŠkola."

Jedna riječ

Na kraju, kada ju se pita da InŠkolu opiše jednom jedinom riječju, Melisa ne razmišlja dugo.

Zajednica.

Aktivnosti se realizuju u okviru projekta Dijalog za budućnost 3 – #DFF3, kojeg provode UNDP Bosnia and Herzegovina, UNICEF Bosna i Hercegovina i UNESCO u saradnji sa Rezidentnom koordinatoricom United Nations in BiH, te u partnerstvu s Predsjedništvom Bosne i Hercegovine i Ministarstvom civilnih poslova Bosne i Hercegovine. Projekt finansira United Nations Peacebuilding (#PBF).

[#DFF3](#) [#dijalogzabuducnost3](#) [#dialogueforthefuture3](#) [#PBF](#) [#ZajednicaNastavnika](#)

Collections

Objava